

UNIVERZITET U SARAJEVU
- SENAT -

Na osnovu člana 89. stav 4. alineja 11. Zakona o visokom obrazovanju ("Službene novine Kantona Sarajevo", broj: 17/99, 14/00, 15/01, 13/02, 12/03, 15/03, 13/04, 31/04 i 22/05), a u skladu sa odredbama člana 167. stav 2. i člana 181. Pravila Univerziteta u Sarajevu, Senat je, na 12. sjednici održanoj 08.02.2006. godine, d o n i o

P R A V I L N I K
O ZADACIMA I NAČINU RADA GRUPACIJA
VISOKOŠKOLSKIH I NAUČNIH ČLANICA
UNIVERZITETA U SARAJEVU

I OSNOVNE ODREDBE

Član 1.

Ovim pravilnikom regulira se nadležnost, odnosno zadaci i način rada grupacija visokoškolskih i naučnih članica Univerziteta u Sarajevu (u daljem tekstu: grupacije), kao i druga pitanja od značaja za rad grupacija.

Član 2.

Grupacije se obrazuju za srodna nastavno-naučna, odnosno nastavno-umjetnička područja, a broj članica, sastav i zadaci grupacija utvrđeni su članom 180. Pravila Univerziteta u Sarajevu.

Član 3.

Grupacije obavljaju poslove i zadatke iz svoje nadležnosti u skladu s odredbama Pravila Univerziteta, a na način i po postupku utvrđenim ovim pravilnikom. Grupacije se obrazuju s ciljem da učestvuju i pomažu u pripremama materijala za sjednice Senata.

II NADLEŽNOSTI I ZADACI GRUPACIJA

Član 4.

Pored zadataka iz člana 180. stav 2. Pravila Univerziteta u Sarajevu, u nadležnost grupacija spadaju i slijedeći zadaci:

- razmatra zajednička pitanja iz oblasti nastave;
- vrši usaglašavanje u realizaciji nastave iz zajedničkih i općih predmeta između visokoškolskih ustanova;
- predlaže Senatu koja je članica pojedine grupacije matična za izvođenje nastave iz stručnih i fakultativnih predmeta;
- učestvuje u realizaciji i izradi zajedničkih naučno-istraživačkih projekata;
- predlaže osiguranje potrebnog nastavnog kadra za opće predmete;
- razmatra prijedloge članica za izbor u nastavna, odnosno naučna zvanja, te utvrđuje eventualne nedostatke u navedenim prijedlozima;
- razmatra prijedloge visokoškolskih ustanova koji se odnose na obrazovanje komisija za doktore nauka, kao i izvještaje o ocjeni uslova kandidata i podobnosti teme doktorske disertacije, te utvrđuje eventualne nedostatke u navedenim prijedlozima;
- razmatra prijedloge nastavnih planova i programa visokoškolskih ustanova, te utvrđuje eventualne nedostatke u navedenim prijedlozima;
- razmatra sva druga pitanja koja se odnose na realizaciju nastavno-naučnog, odnosno nastavno-umjetničkog procesa na visokoškolskim ustanovama Univerziteta u Sarajevu;
- inicira pitanja od vitalnog značaja za rad visokoškolskih ustanova koje su u sastavu pojedine grupacije.

Član 5.

Donesene zaključke, prijedloge, inicijative i mišljenja povodom zadataka utvrđenih u članu 4. ovog pravilnika, grupacije upućuju Senatu Univerziteta u dalju proceduru.

Donesene zaključke, prijedloge i mišljenja, a koji su u suprotnosti sa prijedlozima iznesenim u materijalima pojedinih visokoškolskih ustanova, grupacija dostavlja određenoj visokoškolskoj ustanovi na usaglašavanje.

III NAČIN RADA

Član 6.

Svoj rad grupacije realiziraju putem sjednica koje se održavaju po potrebi, a shodno aktivnostima Senata i visokoškolskih ustanova, odnosno članica Univerziteta. Sjednice grupacija su javne.

Član 7.

Mandati grupacija prate mandat Senata.

Grupacije čine predstavnici članica Univerziteta po principu navedenom u članu 166. Pravila Univerziteta u Sarajevu.

Članovi Senata određenih visokoškolskih ustanova su istovremeno i članovi pripadajućih grupacija.

Član 8.

Na konstituirajućoj sjednici pojedine grupacije bira se predsjednik i dopredsjednik grupacije većinom glasova od ukupnog broja članova grupacije. Predsjednik grupacije (u daljem tekstu: predsjednik) zadužen je za primjenu ovog pravilnika.

Član 9.

Predsjednik i članovi grupacije imaju slijedeća prava i dužnosti:

- da prisustvuju sjednicama grupacije i aktivno učestvuju u njenom radu;
- da pokreću raspravu o pitanjima iz nadležnosti grupacije, odnosno Senata;
- da učestvuju u pripremi akata iz nadležnosti grupacije, odnosno donose određene zaključke, prijedloge i sl.

Član 10.

Sjednicama grupacija, pored članova grupacija, obavezno prisustvuje i prorektor za nastavu, bez prava odlučivanja.

Sjednicama mogu prisustvovati rektor, generalni sekretar Univerziteta, kao i druga lica po pozivu da učestvuju u radu sjednice, također bez prava odlučivanja.

Član 11.

U pripremi sjednica grupacije učestvuju predsjednik i dopredsjednik grupacije, te prorektor za nastavu i generalni sekretar Univerziteta.

Sjednice grupacije saziva predsjednik na vlastitu inicijativu, a po prijedlogu prorektora za nastavu, kao i na prijedlog većine članova grupacije.

Član 12.

Poziv za sjednicu sadrži: dan, vrijeme i mjesto održavanja sjednice, te prijedlog dnevnog reda sa odgovarajućim materijalom.

Poziv za sjednicu grupacije u pravilu se dostavlja u pismenoj formi najkasnije 5 (pet) dana prije održavanja sjednice.

Član 13.

Sjednicom grupacije predsjedava predsjednik, a u njegovoj odsutnosti dopredsjednik.

Sjednica grupacije može početi sa radom ako u njenom radu učestvuje više od polovine članova grupacije.

Zaključci i drugi akti iz nadležnosti grupacije donose se većinom glasova od ukupnog broja članova grupacije.

Član 14.

Na početku rada sjednice grupacije, glasa se o prijedlogu ponuđenog dnevnog reda.

Svaki član grupacije ima pravo da zatraži dopunu ili izmjenu predloženog dnevnog reda pismenim putem uz obrazloženje, najkasnije 3 (tri) dana prije održavanja sjednice, a o čemu se grupacija izjašnjava glasanjem prije usvajanja dnevnog reda.

Svaki član grupacije može tražiti dopunu dnevnog reda i na samoj sjednici ukoliko postoji opravdana hitnost o čemu se grupacija također izjašnjava glasanjem prije usvajanja konačnog dnevnog reda.

Unutar utvrđenog dnevnog reda, članovi grupacije obavezno usvajaju, odnosno, verificiraju zapisnik sa prethodne sjednice.

Član 15.

U slučaju spriječenosti predsjednika da sazove ili predsjedava sjednicom, zamjenjuje ga dopredsjednik, a u slučaju spriječenosti dopredsjednika najstariji član grupacije, oba sa svim ovlastima predsjednika grupacije.

U slučaju spriječenosti člana grupacije da prisustvuje sjednici, može ga, uz pismeno ovlaštenje, zamjenjivati redovni ili vanredni profesor delegiran od strane članice čiji je član grupacije spriječen prisustvovati sjednici.

Član 16.

Po zaključenoj raspravi o pojedinim pitanjima grupacija donosi: zaključke, prijedloge, inicijative, mišljenja i slično, a zavisno od prirode materijala o kojem se raspravlja.

Ako za rješenje nekog pitanja postoji više prijedloga, o svakom prijedlogu glasa se posebno, a po redu podnošenja prijedloga.

Glasanje na sjednici grupacije je javno.

IV ZAVRŠNE ODREDBE

Član 17.

Na sjednici grupacije obavezno se vodi zapisnik.

Zapisnik sadrži:

- datum, mjesto i vrijeme održavanja sjednice;
- redni broj sjednice;
- ime i prezime prisutnih i odsutnih članova grupacije, te drugih učesnika na sjednici;
- usvojeni dnevni red;
- kratak opis, odnosno suštinu izlaganja učesnika;
- formulacije zaključaka, prijedloga, inicijativa i mišljenja donesenih na sjednici;
- broj glasova za donošenje pojedinog akta;
- potpis predsjednika (predsjedavajućeg) grupacije i zapisničara;

Original zapisnika se čuva u arhivi Univerziteta.

Član 18.

Ovaj pravilnik stupa na snagu danom donošenja.

Član 19.

Stupanjem na snagu ovog pravilnika stavlja se van snage Poslovnik o radu grupacija visokoškolskih i naučnih članica Univerziteta u Sarajevu od 28.03.2001. godine.

REKTOR

Prof. dr. Hasan Muratović

Broj: 01-I-180/06
Sarajevo, 08.02.2006. godine